

Morning Regional Dogri News Bulletin, 30th September 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- जम्मू कश्मीर च असेंबली चुनावें दे त्रीए ते खीरले गेड़ लेई सब्बै बंदोबस्त करी लैते गे न।
- आदर्श आचार संहिता दी खलाफवर्जी दे आरोप च जम्मू कश्मीर च 23 सरकारी मलाजमें गी मुअत्तल कीता गेआ ऐ।
- जम्मू दे डिवीजनल कमीशनर रमेश कुमार होरें सांबा जिले च मतदान दे ध्याड़े लेई कीती गेदी तैआरिएं दा जायजा लैता।
- बिलावर च होए दे टाकरे च सुरक्षाबलें इक आतंकवादी गी मारी मकाया ऐ। राजौरी च सुरक्षाबलें ते आतंकवादिएं बश्कार टाकरा छिड़ी पेआ।

<><><><><><>

Election-JK

जम्मू कश्मीर च विधानसभा चुनावें दे त्रीए ते खीरले गेड़ लेई सब्बै तैआरियां करी लैतियां गेइयां न। शातिपूर्ण, रमानदारी ते निरपक्ख ढंगै सिर मतदान करोआने लेई सुरक्षा दे लोड़चदे इंतजाम कीते गे न। कल होने आले त्रीए गेड़ दे चुनावें च 7 जिले दिएं 40एं विधानसभा सीटें लेई वोट पाए जाने न। इनें 40एं थमां 16 कश्मीर खित्ते च ते 24 जम्मू खित्ते च न। कल होने आले मतदान लेई चुनावें प्रचार कल संजा सम्पन्न होई गेआ हा। इस गेड़ ख कुल 415 मेदवार चुनावें मैदान च न ते मतदाताएं दी कुल गिनतरी 39 लक्ख 10 ज्हार ऐ। कुल मतदाताएं च 20 लक्ख 9 ज्हार 33 मर्द, 19 लक्ख 40 ज्हार 92 महिला ते 57 थर्ड जेंडर मतदाता न। जम्मू चुनावी मैदान च मुख्त तौरा पर कांग्रेस, बीजेपी, एनसी ते आजाद मेदवार न। किश मन्ने परमन्ने दे नेता अपना राजनीतिक अस्तित्व बनाने आस्तै चुनावें लड़ा'रदे न। साबका उपमुख्यमंत्री ताराचंद, कांग्रेस मेदवार दे तौर पर छम्ब थमां चुनावें लड़ा'रदे न। इंदा मकाबला बीजेपी दे राजीव शर्मा ते 2 आजाद मेदवार सतीश शर्मा ते नरेन्द्र सिंह कन्नै ऐ। कांग्रेस दे कार्यकारी प्रधान रमण भल्ला आर.एस.पुरा जम्मू साउथ थमां चुनावें मैदान च न। इंदे च साबका मंत्री ते बीजेपी मेदवार शाम लाल शर्मा ते साबका मंत्री ते नैशनल कांफ्रेंस दे मेदवार अजय सडोत्रा जम्मू नार्थ थमां चुनावें लड़ा'रदे न।

साबका मंत्री ते कांग्रेस मेदवार चौधरी लाल सिंह बसोहली थमां चुनावी मैदान च न। इंदे खलाफ बीजेपी दे दर्शन सिंह खड़ोते दे न। उधमपुर चनैनी सीट सीट थमां पेंथर्स पार्टी दे नेता ते साबका मंत्री हर्ष देव सिंह ते बीजेपी तरफा बलवंत सिंह मनकोटिया चुनां मैदान च न। डैमोक्रेटिक प्रोग्रेसिव आजाद पार्टी नै बी अपने मेदवार विधानसभा चुनाएं च खड़े कीते न। 2014 च बीजेपी गी जम्मू संभाग च 37 शा 25 सीटें पर जित्त हासल होई ही ते जम्मू जिले च 11एं चा 9 सीटां अपने नां कीतियां हियां।

<><><><><><><><>

JK-Suspension

प्रदेश च चुनां प्रचार ते होरने सरबंधी सियासी गतिविधिएं च सरकारी मलाजमें दी शमूलियत दा संज्ञान लेंदे होई जम्मू कश्मीर दे चुनां दफतरै 23 मलाजमें गी मुअत्तल करने दे कन्नो कन्नी आदर्श अचार संहिता दी खलाफवर्जी लेई ठेके ते एडहाक पर लाए गेदे 6 मलाजमें गी कम्मै शा हटाई दितता ऐ। एहदे इलावा ऐसे 20 मुलाजमें गी उंदे पराने दफतरें शा हटाइयै होरने तैहसीलें ते जिले दे दफतरे च लाया गेआ ऐ, जिंदे खलाफ फर्कोफर्की आला गैह अख्तिवार करने दियां शकैता सामने आइयां हियां। जारी असैंबली चुनाएं दरान चुनां दफतरै प्रदेश च बक्ख-बक्ख अजेंसिएं दे राएं कुल 130 करोड़ रपे जब्त कीते न। एहदे च पुलस मैहकमे नै सब्बने शा मते 107 करोड़ 50 लक्ख रपे केन्द्री जीएसटी आस्सेआ 9 करोड़ 88 लक्ख शा, राज्य जीएसटी आस्सेआ 8 करोड़ 3 लक्ख रपे, एनसीबी आस्सेआ 2 करोड़ 6 लक्ख रपे, औंदन टैक्स मैहकमे आस्सेआ 87 लक्ख रपे ते स्टेट एक्साईज डिपार्टमेंट आस्सेआ 50 लक्ख रपे जब्त कीते गे न। नशीले पद्दार्थ, नगदी ते शराब गी गैर कनूनी तरीके कन्नै लैने आलें खलाफ सख्त कारवाई करदे होई सरबंधत अजेंसिएं अजें तगर 32 एफआईआर दर्ज कीतियां न।

<><><><><><><><>

Div.Com Jammu

जम्मू दे डिवीजनल कमीशनर रमेश कुमार होरें सांबा जिले दा दौरा लाया ते कल होने आले मतदान लेई कीते गेदे इंतजामें दा जायजा लैता। इस दोरे दा मकसद मतदान गी सुचारू ढंगै सिर करोआने लेई लोड़चदी जरूरी चीजें ते होर दुए सरबंधी इंतजामें दा निरीक्षण करना हा। सांबा दे जिला चुनां अधिकारी राजेश शर्मा हुंदे सनें होरनें दुए अफसरें डिवीजनल कमीशनर होरें गी कीते गेदे इंतजामें बारे दस्सेआ दसाया। डिवीजनल कमीशनर होरें चुनां नियंत्रण कक्ष दा जायजा लैता। इत्थुआं मतदान प्रक्रिया ते चुनां आले दिन जेकर कोई खुनौती पैदा होंदी ऐ तां ओहूदे हल्ल लेई प्रबंधन फौरी तौर पर कीता जाग। इस नियंत्रण कक्ष गी मतदान आले ध्याड़े पैदा होई सकने आली कुसै बी चुनौती कन्ने निबड़ने लेई तैआर कीता गेआ ऐ।

<><><><><><><><>

Samba Election

विधानसभा चुनाव दे त्रीए ते खीरले गेड़ लेई तैआरियां जोरें पर। इस्सै गेड़ च सांबा जिले च बी मतदान होना ऐ। इस गेड़ तैहत मतदान कल होना ऐ। जिला प्रशासन आस्सेआ इनें चुनाव गी रमानदारी ते पारदर्शी ढंगे सिर करोआने लेई लोड़चदे सारे बंदोबस्त कीते गेदे न। जिले च कुल 2 लक्ख 60 ज्हार मतदाता न। इस जिले च त्रै विधानसभा हल्के न। रामगढ़, सांबा ते विजयपुर कुल मतदाताएं दी गिनतरी 2 लक्ख 60 ज्हार 9 सौ 99 ऐ, जिंदे च इक लक्ख 33 ज्हार 736 मर्द, इक लक्ख 27 ज्हार 261 महिला ते 2 थर्ड जेंडर मतदाता न। मतदाताएं दी सहूलत लेई भारतीय चुनाव आयोग आस्सेआ 366 मतदान केन्द्र बनाए गेदे न। इंदे चा 42 शैहरी इलाकें च ते 324 ग्रामी इलाके च न। जिला प्रशासन नै मतदान प्रक्रिया गी रमानदारी ते बवस्था आले ढंगे सिर करोआने लेई लोड़चदियां सहूलतां खास करी महिलाएं, बर्जुगें ते दिव्यांग मतदाताएं लेई उपलब्ध करोआइयां न। जिला प्रशासन नै सारे पंजीकृत मतदाता गी अपील कीती ऐ जे ओह वोट पाने दे अपने अधिकार दा इस्तेमाल पक्क गै करन ते लोकतंत्र दे इस ध्यार च अपनी शमूलियत जकीनी बनान। मतदान बडलै 7 बजे शुरू होग ते संजा 6 बजे तगर जारी रौहग।

<><><><><><>

DEO Udhampur

विधानसभा चुनाव गी दिक्खदे होई उधमपुर दियां जिला चुनाव अधिकारी सलोनी राय होरें जोनल ते सेक्टोरियल मैजिस्ट्रेटें कन्नै बैठक लाई ते उनेंगी भारतीय चुनाव आयोग दे दिशा-निर्देश मूजब उंदी भूमका ते जिम्मेदारिएं बारे अवगत करोआया। जिला चुनाव अधिकारी होरें मैजिस्ट्रेटें पर इस गल्ला लेई जोर पाया जे ओह पूरी चाल्ली सौहगे ते सर्तक रौहन। उनें चुनाव प्रक्रिया गी पारदर्शी ते सेई चाल्ली करोआने लेई उंदी भूमका गी उजागर कीता। उनें इनें सब्बनें गी मतदान अधिकारिएं, रिटर्निंग अफसरें ते होर दुए सरबंधी घड़ें कन्नै नेड़मा तालमेल बनाइयै कम्म करने लेई बी गलाया।

<><><><><><>

Dr. Jatinder Singh

केन्द्री मंत्री डॉ. जितेन्द्र सिंह होरें आखेआ ऐ जे कश्मीर लोकतंत्र दा उत्सव मना करदा ऐ ते लोकतंत्र दियां आसां-तांगां परतियै नमें सिरैया अग्गे बधै करदियां न। खबरें आले इक चैनल गी दित्ते गेदे इंटरव्यू च डॉ. सिंह होरें आखेआ जे अज्ज अस सब्बे जम्मू कश्मीर च लोकतंत्र गी मुख्खधारा कन्नै जुड़दा दिक्खै करने आं ते एहदा पूरा श्रेय प्रधानमंत्री नरेन्द्र मोदी होरें गी जंदा ऐ। पानी सरबंधी अधिकारें दे मामले पर डॉ. सिंह होरें एहदा श्रेय प्रधानमंत्री होरें गी दित्ता ते आखेआ जे सिंधुजल संधि तैहत रूके दे पेदे प्रोजेक्टें गी उनें सबूरा कीता ऐ। उनें केई दहाकें थमां बुनियादी अधिकारें शां वचित रेहदे पच्छमी पाकिस्तान रिफ्यूजिएं दी माड़ी दशा बारे बी खुल्लियै गल्ल कीती।

डॉ. सिंह होरें भारत दे आर्थिक भविष्य च जम्मू कश्मीर दी महत्वपूर्ण भूमिका बारे बी बचार सांझे कीते। उनें आखेआ जे भद्रवाह दी बेंगनी क्रांति, रियासी च लीथियम दे भंडार ते किश्तवाड़ च नीलम दी खान्नें जनेह संसाधनें दे दम उप्पर जम्मू कश्मीर भारत गी आर्थिक महाशक्ति बनाने च महत्वपूर्ण भूमिका नभाग।

<><><><><><>

Encounter

कठुआ जिले दी बिलावर तैहसील दे कोग मांडली ग्रां च सुरक्षाबलें टाकरे दरान इक आतंकवादी गी मारी मकाया ऐ। टाकरे आली थाहर थमां भारी मात्रा च असला बरूद बरामद कीता गेआ। ग्रनेड लांचर, किश ग्रनेड ते होर दुआ समेयान मारे गेदे आतंकवादी थमां बरामद कीता गेआ ऐ। मीडिया कर्मिणं गी संबोधत करदे होई एडीजीपी जम्मू जोन आनंद जैन होरें आखेआ जे तपाशी अभियान इलाके च चलाया गेआ हा। एह अभियान इलाके च त्रै थमां 4 विदेशी आतंकवादिणं दी मजूदगी बारे थहोई दी जानकारी दे चलदे चलाया गेआ। तोआई राजौरी जिले दे थन्नामंडी कस्बे दे इक इलाके च बी सुरक्षाबलें ते आतंकवादिणं बश्कार टाकरा भखी पेआ। इलाके च आतंकवादिणं दी मजूदगी बारे थहोई दी सूह दी बिनाह पर गै इलाके दी घेराबंदी करियै तपाशी अभियान चलाया गेआ हा।

<><><><><><>

Jaishankar-US

विदेश मंत्री डॉ. एस.जयशंकर होरे कल वाशिंगटन डीसी च अपने अमरीकी हमरूतबा टोनी ब्लिंकन हुंदे नै मलाटी करगंन। इस दरान दौनें बश्कार केई सारे दपक्खी ते वैश्विक मामलें जेहदे च यूक्रेन युद्ध ते पच्छिम एशिया सरबंधी मामले शामिल न दे बारे च चर्चा होग। डॉ. जयशंकर होरें कल अमरीका दी राजधानी पुज्जे हे। ओह इस दरान बाइडेन प्रशासन दे होर केई बड्डे मंत्रिणं ते अधिकारिणं कन्नै बी मिलगंन। एहदे इलावा उंदा अमरीका च कूटनीतिक मामले दे बचारमंच ते माहिरें कन्नै बी मलाटी लाने दा कार्यक्रम ऐ। एहदे शा पैहले इस म्हीने दी 21 तरीक गी डेलावेयर च अपने निवास पर अमरीका दे राष्ट्रपति जो बाइडेन होरें प्रधानमंत्री नरेन्द्र मोदी हुंदी मेजबानी कीती ह ीते दौनें बश्कार दपक्खी बैठक बी होई ही।

<><><><><><>

Road Safety Poonch

पुंछ जिले च शिड़क सुरक्षा सरबंधी तरीकाकारें गी बढ़ावा देने दे मकसद कन्नै पुंछ दे जिला विकास आयुक्त विकास कुंडल होरें जिला सतह दी शिड़क सुरक्षणा कमेटी दी बैठक लाई। उनें शिड़क सुरक्षा गी जकीनी बनाने लेई बहु-आयामी तरीकाकार ते नजरिया अपनाने लेई आखेआ। उनें हादसा होई सकने दी शेंका आली थाहरे दी ताल करने, तेज रफतार, समर्थ थमां बद्ध सुआरियां बठाने जनेह चीजे थमां लोके गी सौहगा ते जागरूक बनाने लेई गलाया। उनें ट्रैफिक पुलस, शिड़क ते ट्रांसपोर्ट मैहकमे ते होर दुई अजेसिएं बश्कार तालमेल पर जोर पाया। उनें डरैवर, पैदल चलने आले ते विद्यार्थिएं गी ध्यानै च रखदे होई जागरूकता अभियान चलाने लेई गलाया।

<><><><><><>

DC Samba

ओंदे नराते ते दशैहरे दे ध्यार गी दिक्खदे होई सांबा दे डिप्टी कमीशनर राजेश शर्मा होरें इनें ध्यारें दी तैआरिएं दा जायजा लैने लेई सब्बने मुत्तलका हाडे कन्नै उच्च सतह दी बैठक लाई। बैठक दरान धार्मिक संगठनें दे नुमायंदे आस्सेआ बक्ख-बक्ख मामले गी पुट्टेआ गेआ। नुमायंदे आस्सेआ पुट्टे गेदे मसले दे आधार डिप्टी कमीशनर होरें सब्बने सरबंधी मैहकमे गी हिदायत कीती जे ओह सारे जायज मसले दा पैहल दी बिनाह पर हल्ल करन। उनें सब्बने मैहकमे गी आपूं चै नेडमा तालमेल बनाइयै कम्म करने लेई आखेआ तां जे सारे मामले दा हल होई सकै।

<><><><><><>

Cyber Crime

जानीपुर जम्मू च स्थित जम्मू कश्मीर न्यायिक अकैडमी च मेडिकल फारेंसिक्स ते मैडिको-लीगल पैहलुएं ते साइबर अपराधें ते इलैक्ट्रानिक सबूते दे बक्ख-बक्ख आयामें बारे लोआया गेदा दऊं दिनें दा सिखलाई कार्यक्रम कल सम्पन्न होई गेआ। न्यायिक अकैडमी आस्सेआ इस कार्यक्रमें दा आयोजन जिला न्यापालिका दे जजे, सरकारी वकीले ते जम्मू संभाग दे जांच अधिकारिएं लेई कीता गेआ हा। इस दरान माहिरें सूचना-टेक्नालाजी कनून बारे बक्ख-बक्ख ऐतिहासक फैसले ते साइबर अपराधें कन्नै सरबंधत मुकदमे लडदे बेल्ले अपने तर्जुबें बारे बी जानकारी दित्ती। उनें इलैक्ट्रानिक सबूते ते कनून तैहत् इनेंगी दित्ती जाने आली तवज्जो पर बी लोह पाई।

<><><><><><>